



BILTEN

OPĆINE SREBRENİK



CERTIFIKAT ISO 9001:2000
BROJ: 15546



IZDAJE: OPĆINA SREBRENİK • BROJ: 31 • MJESEC: JUNI/LIPANJ 2010. • BILTEN JE BESPLATAN • TIRAŽ 500



**SRETAN VAM 21. JUNI
DAN OPĆINE SREBRENİK**

Obilježen 1. mart, Dan nezavisnosti BiH



Položeno je cvijeće na spomen-kosturnicu

Dana 27.02.2010.godine, u velikoj sali Doma kulture u Srebreniku, održana je svečana sjednica Općinskog vijeća Srebrenik, kojom je na prigodan način obilježen 1. mart, Dan nezavisnosti BiH. Pored općinskih vijećnika, svečanoj sjednici prisustvovali su i predstavnici zakonodavne i izvršne vlasti Federacije BiH i Tuzlanskog kantona, te predstavnici boračkih udruženja, vjerskih zajednica i privrednih kolektiva s područja ove općine. Podsjetivši na referendum održan prije 18 godina, na kojem je većina bh. građana izrazila svoje opredljenje da želi živjeti u nezavisnoj i suverenoj BiH, općinski načelnik Osman Suljagić je posebno naglasio da ovom svečanom akademijom građani općine Srebrenik iskazuju dužno poštovanje prema jednom od najznačajnijih datuma u historiji naše države. U okviru obilježavanja Dana nezavisnosti BiH, predstavnici općine Srebrenik i srebreničkih boračkih udruženja položili su i cvijeće na Centralno spomen-obilježje i spomen-kosturnicu u centru grada.

Obilježene godišnjice 211. oslobodilačke brigade i Štaba TO Srebrenik

Okupljanjem bivših boraca, predstavnika zakonodavne i izvršne vlasti na Trgu Alije Izetbegovića i polaganjem cvijeća na Centralno spomen-obilježje šehidima i poginulim borcima, u

Srebreniku je obilježena 15. godišnjica formiranja 211. oslobodilačke brigade. –Od samog osnivanja imala je blistav ratni put, a njeni pripadnici svoju hrabrost i vještinu ratovanja pokazali su u zoni odgovornosti Drugog korpusa, na posavskom i sarajevskom ratištu, te u Bosanskoj krajini, u rejonu Ključa i Sanskog Mosta, gdje su i dočekali potpisivanje primirja-istakao je pukovnik u penziji Ibrahim Salihović, ratni komandant brigade i nosilac „Zlatnog ljiljana“. Prigodnom svečanošću na trgu Alije Izetbegovića u Srebreniku obilježena je i 18. godišnjica formiranja Štaba TO Srebrenik. Pred okupljenim bivšim borcima uspomene na ratne događaje u Srebreniku na samom početku agresije na BiH evocirali su Mehmed Barjaktarević, predsjednik ratnog Predsjedništva općine Srebrenik i Fadil Vikalo, prvi komandant Štaba Srebrenik. Nakon polaganja cvijeća na oba spomen-obilježja, u planinskom domu „Lipici“, upriličeno je tradicionalno druženje bivših boraca srebreničkih ratnih brigada i njihovih gostiju iz većine općina s područja TK-a.

Obilježen 15. april, Dan Armije BiH

Na svečan način obilježen je i 15.april, Dan Armije BiH, kojem su prisustvovali predstavnici izvršne i zakonodavne vlasti Općine Srebrenik, zatim komandanti, demobilisani borci kao i porodice šehida i poginulih boraca sa područja općine Srebrenik. Nakon polaganja cvijeća na oba spomen-obilježja, prigodan referat povodom Dana Armije BiH, podnio je Ibrahim Salihović, komandant 211. oslobodilačke brigade Srebrenik, koji je između ostalog govorio o zna-



Položeno je cvijeće na Centralno spomen-obilježje

čaju koja je kasnije prerasla u Armiju BiH, kao i o njenoj spremnosti da se odupre agresoru koji je pod direktivom srpsko-četničke stranke SDS-a, krenuo u okupaciju BiH. Njihova akcija nije uspjela samo zahvaljujući spremnosti Armije BiH da se odupre znatno snažnijoj vojnoj formaciji. Povodom ovog značajnog datuma upriličen je i svečani prijem u kabinetu općinskog načelnika Osmana Suljagića.

Podpredsjednica FBiH Spomenka Mičić posjetila Općinu Srebrenik



Sa sastanka sa podpredsjednicom FBiH Spomenkom Mičić

Načelnik Općine Srebrenik Osman Suljagić, sa svojim saradnicima, dana 01.04. 2010.godine, ugostio je podpredsjednicu FBiH Spomenku Mičić, s kojom se razgovaralo uglavnom o održivom povratku prognanih i raseljenih lica srpske nacionalnosti. Nakon sastanka podpredsjednica Mičić je izašla pred novinare te kazala svrhu dolaska u Srebrenik. -Posjeta općinama u FBiH je moj fokus, jer su dobro uređene i snažne lokalne zajednice pretpostavka za snažnu državu. Uvjerena sam da na svim nivoima vlasti, ako prepoznamo potrebe građana i njihova prava, možemo postizati određene rezultate. Danas smo najviše razgovarali o povratku. Od završetka rata prošlo je 15 godina a veliki broj prognanika se nije vratio na svoje. A, s druge strane, oni koji su se vratili ne ostvaruju sva svoja prava. Općina Srebrenik je jedna od rijetkih općina koja dosta dobro komuni-

cira sa povratnicima, vodi se s njima redovni dijalog o tome šta je to potrebno povratnicima da se za njih uradi. Danas smo ovdje vidjeli nekoliko projekata koji mogu zapošljavati različitu strukturu povratnika, i kada je u pitanju stručna sprema ali i starosna dob. Da bismo to postigli mi moramo normalno animirati i više nivoe vlasti, a to su kantonalne, federalna pa i državna Vlada. Mislim da je ovdje veliki problem podijeljenost nadležnosti. Dosta zakona donosimo na višim nivoima, a njihovu implementaciju sprovodimo na nižim nivoima vlasti i ubuduće moramo voditi računa da se to popravi. Ja lično vjerujem da će ovakav način saradnje Općine Srebrenik sa povratnicima dati sigurno rezultate, jer sigurno je da se svaki povratnik najbolje može osjećati kod svoje kuće. Ovdje ima dosta plodne zemlje i mi jednostavno moramo omogućiti ljudima da obrađuju tu

zemlju jer oni to žele, kazala je Mičić. Načelnik Općine Srebrenik Osman Suljagić je govorio o konkretnim projektima koji su planirani da se urade a koji bi pomogli održivi povratak. -Razgovarali smo o nekoliko projekata koji će omogućiti održivi povratak Srba na području općine Srebrenik. U pitanju su tri projekta. Dva projekta u okviru zemljoradničke zadruge koja je formirana prije tri godine, to je projekat organizovanog otkupa mlijeka i projekat proizvodnje i otkupa voća i povrća te ljekovitog bilja. Vjerujemo kako

ćemo za ove projekte pronaći sredstava sa viših nivoa vlasti. Također razgovarali smo i o pogonu Kemala Aletića iz područja metalne prerade. Za sada taj pogon zapošljava blizu 60 ljudi. Uz pretpostavku da se još jedan pogon izradi u Potpeću na površini od 1.500 metara kvadratnih, moglo bi se zaposliti novih 15 ljudi. Ovaj projekat zavređuje pažnju i mi smo zamolili podpredsjednicu FBiH da nam tu pomogne. Osim sredstava koja ćemo mi izdvojiti iz budžeta Općine, tražit ćemo i namjenska sredstva sa viših nivoa vlasti i smatram da ta potpora ne bi trebala izostati, jer to jedan od načina za održivi povratak, kazao je načelnik Suljagić. Nakon razgovora u Općini, podpredsjednica je posjetila Dječije obdanište u Srebreniku te naselje Potpeć, koje je prije rata bilo većinski naseljeno Srbima, koji se polako vraćaju na svoja prijeratna ognjišta.

Budžet za 2010. g. 11.133.000 KM



Sa 15. sjednice OV-a Srebrenik

Na 15. sjednici Općinskog vijeća Srebrenik, usvojen je budžet za 2010. godinu u iznosu od 11.133.000 KM. Kako je kazao načelnik Općine Osman Suljagić, za kapitalna ulaganja izdvojit će se 35%, 27% za plaće te blizu 38% za ostala izdvajanja. Takođe je izjavio da je budžet planiran naspram realnih prihoda i rashoda te cjelokupne ekonomske situacije u državi. Predstavnici opozicionih partija smatrali su da treba nastojati povećati prihode od koncesija, zatim da ne treba započinjati ove godine sa izgradnjom zgrade Općinskih organa, te da se pokušaju povećati sredstva za nezaposlene, mlade, poljoprivredu, razvoj lova i turizma, što na kraju ipak nije prihvaćeno. Bez većih rasprava usvojene su i Odluke o izvršenju budžeta za 2010. godinu, kao i Program uređenja gradskog građevinskog zemljišta za ovu godinu, gdje je planirano da se investira blizu 3.500.000 KM i to za rekonstrukcije ulica, uređenje ispred stambeno-poslovnih objekata, izradu signalizacija, izgradnju novih ulica, vodovoda, kanalizacionih krakova, trotoara, mostova, nasipa... U infrastrukturu za ovu godinu predviđeno je da se utroši više od 3 miliona maraka i to za ceste, mostove, vodovod, kanalizaciju, toplifikaciju, sportske terene, spomen-obilježja, hidro-geološka istraživanja, regulaciju korita rijeke Tinje, za uređenje „Starog grada-Gradine“ itd. Vijećnici su raspravljali i o izmjenama i dopunama Poslovnika o radu Općinskog vijeća, a s obzirom da je bilo mnogo primjedbi i sugestija, o njemu će se voditi rasprave i na narednim sjednicama, a one se uglavnom odnose na formiranje klubova vijećnika, ograničavanju postavljanja broja vijećničkih pitanja, inicijativa za donošenje određenog akta... Usvojene su i informacije i izvještaji o prirodnim nepogodama, koje su ove godine iznosile blizu 103.000 KM, dok su vijećnici izrazili zadovoljstvo konkretnijim aktivnostima na rješavanju toplifikacije grada i prigradskih naselja, koje je podnio koordinator za ove poslove, Fahrudin Karić. Pred vijećnicima se našao i projekat izgradnje brze ceste Orašje-Tuzla, gdje je

apostrofirano kako se treba tražiti od nadležne institucije i nosilaca izrade Studija, da se u sklopu ovog projekta obavezno planira izgradnja priključka na cestu u predjelu planiranog sportsko-rekreativnog centra na Majevidi i priključne ceste do Centra Srebrenika. Vijećnici su usvojili i odluku o obavljanju volonterskog rada nezaposlenih osoba sa visokom i višom stručnom spremom, nezaposlenih diplomiranih kriminalista, te se ovlašćuje općinski načelnik da u saradnji sa MUP-om TK realizira ove aktivnosti.

Povećane cijene komunalnih usluga

S obzirom na tešku situaciju u JP „Vodovod i kanalizacija“ Srebrenik, kako je obrazložio menadžment ovoga preduzeća, vijećnici OV-a Srebrenik, na 16. sjednici, nisu prihvatili da se umjesto dosadašnjih potrošenih 10 metara kubnih vode viša cijena primjenjuje na sve potrošene količine preko 7 metara kubnih vode, nego je usaglašeno da ostane dosadašnji način raspodjele ali da se za sve korisnike poveća cijena vode za 10%. Na težak položaj požalili su se i iz JP „9. septembar“ tako da je, nakon duže rasprave po ovom pitanju, usvojeno i povećanje cijena odvoza smeća za gradsko i prigradsko područje u visini od 15%, a za ostala naselja u visini od 13%. Od ostalih tačaka treba izdvojiti kako su vijećnici usvojili izmjene i dopune Pravilnika o radu Općinskog vijeća, a među najzanimljivijim je ograničavanje broja postavljanih vijećničkih pitanja po sjednici OV-a, te da ubuduće najmanje 2 vijećnika mogu činiti Klub vijećnika, a ne kao do sada jedan. Takođe je usvojena i odluka o pružanju pomoći boračkoj kategoriji prilikom otkupa stanova u kojima oni trenutno žive, prema kojima će im se iz općinskog budžeta u periodu od 2007. godine do 2016. godine za ovu namjenu izdvojiti 161.727, 50 KM. S obzirom da kreće sezona izgradnje, usvojena je i prosječna konačna građevinska cijena kvadratnog metra stambene površine koja će za ovu godinu iznositi kao i za prošlu 950 KM. Usvojen je i izvještaj o radu općinskog pravobranilaštva uz primjedbu vijećnika da se ubuduće dostavlja i pregled kako bi se znalo koliko je na kojem slučaju Općina oštećena, dok je bez primjedbi usvojen izvještaj Sportskog saveza za prošlu godinu, kao i boračkih organizacija te JU „Narodni univerzitet“. Mnogo rasprave izazvala je informacija o inspekcijском nadzoru općinske inspekcije, gdje je konsatovano kako ona treba da znatno bolje radi, kako bi se inspekcijски poslovi još bolje obavljali, ali je također istaknuto da se inspektori moraju znatno bolje tehnički opremiti (računari, vozila i dr. oprema) kao i da se mora izvršiti popuna sistematizovanih radnih mjesta inspektora, koja su trenutno nepopunjena. Tokom rada na ovoj sjednici je usvojena i informacija Crvenog krsta Srebrenik o dobrovoljnom darivanju krvi na našem općinskom području u prošloj godini.

Izvještaj sa 17. sjednice OV-a

Najviše rasprave na 17. sjednici Općinskog vijeća Srebrenik, izazvala je tačka o Programu zaštite okolice na području općine Srebrenik, koji se odnosi na sakupljanje otpada, zaštitu voda, zraka, zemljišta..., ali s obzirom da je bila u nacrtu, o njoj će se još raspravljati na narednim sjednicama. Ipak, konstatovan je veliki problem što je svega 60% stanovništva uključeno u organizovani odvoz otpada, zbog čega je naglašeno kako se mora dodatno pojačati



Sa 17. sjednice OV-a Srebrenik

rad komunalne inspekcije. Također, već sredinom ove godine popuniti će se svi kapaciteti za odlaganje otpada na postojećoj općinskoj deponiji u Babunovićima, pa će se morati ili proširiti njeni kapaciteti ili pronaći nova lokacija za odlaganje otpada. Izvještaj o izvršenju budžeta i Odluka o usvajanju godišnjeg obračuna budžeta za 2009. godinu, kao i Izvještaj o radu načelnika i općinskih službi za prošlu godinu, također su usvojeni, uglavnom bez neke veće rasprave. Vijećnici su prihvatili i prijedlog o objavljivanju oglasa za imenovanje Općinskog pravobranioca, dok je usvojena i odluka da prosječna konačna građevinska cijena kvadratnog metra korisne stambene površine bude kao i prošlogodišnja tj. 950 KM. Utvrđeno je da se za Dan općine dodijele tri Plakete, četiri Povelje, osam Zahvalnica, pet novčanih nagrada, te osam Zahvalnica koje dodjeljuje načelnik Općine. Pred vijećnicima su bile i informacije o organizovanju i funkcionisanju snaga Civilne zaštite općine Srebrenik, te o gazdovanju lovnim područjem za 2009/2010. godinu. Prihvaćen je i prijedlog da se dosadašnjem Upravnom odboru JU „Dom zdravlja“ produlji mandat do okončanja postupka imenovanja novog saziva UO. Ratnom vojnom invalidu Aganu Mašiću, dozvoljena je, uz naknadu, izgradnja stambeno-poslovnog objekta u Radničkoj b.b. na površini od 64 kvadratna metra, dok je na ovoj sjednici data saglasnost i Vladi TK za donošenje Odluke o pristupanju dodjeli koncesije za izgradnju tri teniska terena u blizini bazena „Inter“ u Srebreniku.

Izvještaj sa 18. sjednice OV-a

Najviše rasprave na 18. sjednici Općinskog vijeća Srebrenik, kako se i očekivalo, izazvao je Prijedlog izmjene i dopune Programa izgradnje infrastrukture na području općine Srebrenik, koji je prema riječima načelnika Općine Srebrenik Osmana Suljagića, predložen zbog toga što su, nakon usvajanja budžeta za 2010.g., s terena došle informacije i zahtjevi da se uvrste drugi prioriteti u izgradnji puteva, kanalizacionih krakova, vodovodnih mreža...Ipak, većim dijelom ove sjednice preovladavali su izvještaji javnih preduzeća i ustanova od kojih je najveću pažnju pobudio Izvještaj JU „Centar za socijalni rad“, gdje je istaknuto da uposlenici rade u dosta teškim uslovima i da su vrlo često izloženi određenim prijetnjama pa i fizičkim napadima od strane korisnika usluga, uz akcenat da veliki broj korisnika samo pokazuje da se veliki broj stanovništva nalazi u jako teškoj materijalnoj situaciji. U Izvještaju JP „9. septembar“ naglašeno je da menadžment pokušava kroz razne kampanje da poveća broj korisnika organizovanog odvoza otpada, a jedan od prijedloga je bio i da „Radio Srebrenik“ kroz edukativni program pokušava animirati građanstvo kako bi se povećala svijest o organizovanom prikupljanju i odvozu otpada. Od JP „Vodovod i kanalizacija“ zatraženo je da



Sa 18. sjednice OV-a Srebrenik

se dodatno angažiraju kako bi i preostali građani sa ovog općinskog područja, koji imaju problema sa vodosnadbijevanjem, imali što više pitke vode. Podpredsjedavajući OV Safet Omerović u Izvještaju JU „Sportsko-rekreativni centar“ Srebrenik, kazao je kako bi trebalo konačno riješiti problem pada, koji se svake godine renovira, a koji je nastao zbog propusta u njegovoj izgradnji. Bez većih rasprava usvojeni su i izvještaji o radu JZU "Dom zdravlja" Srebrenik, JZU "Gradska apoteka" Srebrenik, JU "Centar za kulturu i informisanje" Srebrenik i JU "Za odgoj i obrazovanje djece predškolskog uzrasta" za period od 01.01. 2009. do 31.12.2009. g. Također, vijećnici su usvojili i osnivanje dviju novih mjesnih zajednica i to MZ Preville i MZ Zahirovići te informaciju o gazdovanju šumama i stanju šuma na području općine Srebrenik.

Potpisani ugovori za 11 diplomiranih kriminalista

Načelnik Općine Srebrenik Osman Suljagić i ministar unutarnjih poslova u Vladi Tuzlanskog kantona Sead Omerbegović, dana 31.03.2010.g., potpisali su ugovore za 12 diplomiranih kriminalista, koji će od 01. aprila započeti sa obavljanjem pripravničkog staža u Policijskoj stanici Srebrenik. Ministarstvo unutrašnjih poslova TK dalo je saglasnost Općini Srebrenik za volontiranje 11 diplomiranih kriminalista, tj. za obavljanje pripravničkog staža. -Projekat je faktički počeo odmah, tako da su ovi mladi ljudi skinuti sa evidencije Biroa za



Sa potpisivanja ugovora

zapošljavanje i započeće sa obavljanjem pripravničkog staža u našoj Policijskoj stanici. Istina, nisu to neka velika sredstva koja će se izdvojiti za ovu namjenu, ali obzirom na stanje u državi i ovu krizu koja pogađa sve sfere života, kao i sa našim trenutnim mogućnostima u budžetu, i da smo htjeli više nismo mogli. Ipak od svega je najvažnije da ovi mladi ljudi odrade pripravnički staž odn. da u budućnosti mogu ravnopravno da konkurišu za dobivanje stalnog posla, kazao je načelnik Općine Srebrenik, Osman Suljagić. Ovo je nema sumnje velika stvar ne samo za mlade ljude koji će početi obavljati pripravnički staž, nego i za MUP Tuzlanskog kantona i Općinu Srebrenik, a ministar Omerbegović nakon potpisivanja je kazao: - Prije svega želim da se zahvalim načelniku Suljagiću i Općinskom vijeću u Srebreniku, koje je imalo razumijevanje za ove mlade i perspektivne ljude. Prije Srebrenika u ovaj projekat su ušle općine Kalesija, Živinice i Gradačac, a vjerujem kako će i druge općine na području TK slijediti primjer pozitivne prakse Srebrenika, koji je do sada omogućio obavljanje pripravničkog staža za blizu 400 mladih ljudi, što je za svaku pohvalu, posebno u današnjem vremenu velike nezaposlenosti.

Civilnim invalidima Srebrenika oprema vrijedna 100.000 KM



Sa dodjele donacije srebreničkim civilnim invalidima

Udruženje „Civilnih invalida I i II kategorije“ Srebrenik dobilo je krajem aprila 2010.godine, od turske humanitarne organizacije „International Heavy Haul Assotiation“ (IHHA), opremu u ortopedskim pomagalima vrijednu blizu 100.000 KM. Njihovi predstavnici boravili su tih dana u Srebreniku, gdje su i uručili ovu donaciju predsjedniku udruženja Enesu Džaniću. -Mi smo humanitarna organizacija turske dijaspore koja ima sjedište u Njemačkoj. Formirani smo za vrijeme rata u BiH. Nas su kontaktirali iz organizacije „Grupa naučnika Bosnia“, tačnije Amira Biber koja je iz Srebrenika, a već nekoliko godina živi i radi u Njemačkoj. Čim smo doznali šta je to potrebno ljudima u BiH, odmah smo se bacili u akciju kako bi udovoljili ovim ljudima, kazala je prilikom uručenja ove donacije, Zelha Vural.

Donirana je oprema od 100.000 KM

Srebrenički civilni invalidi dobili su 20 kreveta sa električnim podešavanjem naslona, 45 ručnih kolica, 20 rolera, 20 toalet stolica, 20 pari štaka te 5 električnih kolica, sve ukupne vrijednosti blizu 100.000 KM.

- Ovo je do sada najveća a ujedno i najvrednija donacija kada su u pitanju civilni invalidi iz Srebrenika. Mnogo ljudi već godinama vapi za ovakvim pomagalima, a sada ćemo ih zasigurno sve obradovati, kazao je predsjednik Udruženja „Civilnih invalida I i II kategorije“ Srebrenik, Enes Džanić. Ovo Udruženje trebalo je dobiti i jedan kombi, međutim on je zadržan na granici, ali u Udruženju vjeruju kako će uspjeti ubijediti graničnu policiju da im se dopusti uvoz ovog kombija, koji će im biti također od velike koristi.

Posjeta predstavnika Fonda za razvoj Kraljevine Saudijske Arabije



Sa sastanka sa predstavnicima Saudijskog Fonda za razvoj

Predstavnici Fonda za razvoj Kraljevine Saudijske Arabije krajem maja 2010.g. su posjetili općinu Srebrenik. Na sastanku s općinskim načelnikom Osmanom Suljagićem i njegovim saradnicima, te predstavnicima Ministarstva finansija BiH i Vlade Tuzlanskog kantona razgovarali su o razvojnim projektima na području ove općine za čiju se realizaciju očekuje finansijska podrška Saudijskog fonda za razvoj.



Doček delegacije Fonda za razvoj Kraljevine Saudijske Arabije

Ova posjeta organizirana je na prijedlog Ministarstva finansija BiH

koje je sačinilo listu prioriteta u bh. općinama, a kao jedan od najprioritetnijih projekata općina Srebrenik je kandidirala izgradnju nove općinske zgrade. Vrijednost


projekta je oko 4 miliona KM, a njegovom realizacijom konačno bi se riješio višegodišnji nedostatak adekvatnog prostora za općinske službe koje su sada smještene u neuslovnim prostorima-barakama na više različitih lokacija u gradu Srebreniku. Općina Srebrenik je već uradila i revidovala projektnu dokumentaciju i ima svoje zemljište, a finansijska sredstva bi se trebala osigurati putem povoljnog kredita Saudijskog fonda za razvoj u iznosu od 2,6 miliona dolara, s grejs periodom od 5 godina, rokom otplate od 20 godina i znatno manjom kamatom od one koju trenutno nude komercijalne banke na području Bosne i Hercegovine.



Prednja fasada buduće nove zgrade Općine

"Žaba" oduševila Srebreničane

Teško se sjetiti kada je jedan pozorišni komad privukao toliko posjetilaca u srebreničku kinosalu Centra za kulturu i informisanje, kao što je to bila predstava „Žaba“, koju je prema tekstu Dubravka Mihanovića, na scenu rediteljski postavio Elmir Jukić. Predstava za reditelja Jukića, koja je u Srebreniku izvedena u sklopu obilježavanja „Dana



Detalj sa predstave

povelje 2010“, tematizira bitne i relevantne stvari današnjice na ozbiljan način. Urađena je s porukom koju osjeća kao deficit naše sredine – optimizam. On vjeruje da možemo sami promijeniti svoje živote vlastitim angažmanom, ne očekujući pravnu državu i ne okrivljujući društvo za loše živote. Tekst je vrlo precizno napisan, potpuno se bavi problemima današnjeg vremena koji su isti ili slični u BiH, Hrvatskoj ili drugdje. To je prvenstveno problem nepostojanja komunikacije i nemogućnosti da čujemo tuđe mišljenje. „Bajram je. Zeko je bivši branilac koji boluje od PTSP-a, i vlasnik je brijačnice na periferiji grada. Njegov brat Toni ima problematičan brak, a i voli popiti i prokockati.



Predstava je privukla veliku pažnju Srebreničana

Grga, prijatelj koji navrati u brijačnicu svako malo, vozač je taksija i ima nefunkcionalan odnos s bitno mladom djevojkom od sebe. Zeko, koji je nasilnik, raskinuo je odnos sa svojom ženom i kćeri, i nakon

žustrog razgovora sa svojim prijateljima ostaje sam u svojoj brijačnici, sa iz rata sačuvanom ručnom bombom, koju planira upotrijebiti da bi sam sebi okončao muke. Ali, hvala Bogu, mladi i pametni diplomirani komparatisti književnosti ne mogu pronaći posao, pa prodaju knjige od vrata do vrata da bi preživjeli, i ne sluteći da će njihov ulazak u određenu brijačnicu rezultirati još nečijim preživljavanjem...U predstavi su maestralno glumili Emir Hadžihafizbegović, Aleksandar Seksan, Senad Bašić i Moamer Kasumović

Promovisan časopis i roman

Dana 16.02.2010.godine, u plavoj sali Doma kulture u Srebreniku, u sklopu manifestacije „Dani povelje 2010“, održana je promocija četvrtog broja časopisa „Ševak“, kao i promocija knjige „Sevdali mantra“, autora Refika Mujezinovića, mladog pisca porijeklom iz Srebrenika, koji živi i radi u Sarajevu. Četvrti broj časopisa „Ševak“, prema riječima glavnog i odgovornog urednika Sadila Mehmedovića, donosi nove priče o nekadašnjem i sadašnjem Srebreniku, te o njegovim ljudima. Značajna pažnja posvećena je i srednjovjekovnoj tvrđavi i naporima koji



Promocija časopisa "Ševak" i knjige "Sevdali mantra" se ulažu na njenoj revitalizaciji, a centralno mjesto zauzima tekst pod naslovom „Nadam se da ću se u Srebreniku popraviti“ posevećena boravku Meše Selimovića 3. februara 1944. godine u Gornjem Srebreniku i vezama jednog od najvećih južnoslovenskih književnika sa Srebrenikom. – „Sevdali mantra“ je psihološki roman vješto destruktuivane konstrukcije čija je radnja nabijena emotivnom, a u isto vrijeme i morbidnom atmosfereom na klackalici zavodljivo duhovitih pasaža i bizarnih obrata“, istakao je pred neuobičajeno velikim brojem ljubitelja pisane riječi recenzent Nedim Suljić. Govoreći o motivima nastanka ovog romana, sam autor je istakao da ovo može biti i svojevrsna priča o tragediji jedne neostvarene ljubavi jer ima nešto mazohističko u ljudima s ovih prostora kada je u pitanju ljubav. – „Sevdah je kad te tijelo tako boli da te obuzme milina od boli koju prouzrokuje“, istakao je Mujezinović.

Godišnjak BZK Preporod

U prepunoj „Plavoj sali“ Centra za kulturu i informisanje Srebrenik, Bosanska zajednica kulture (BZK) „Preporod“ Srebrenik, promovisala je prvi broj „Godišnjaka“. Riječ je o javnom glasilu koji govori o 14 godina postojanja BZK „Preporod“ u Srebreniku, zatim historiji Bošnjaka kako na ovom području tako i u cijeloj BiH. Inače, o dosadašnjem radu ove zajednice nije postojao nikakav



S promocije Godišnjaka BZK Preporod i CD-a Ahmeta Hogića

pisani trag, a kako je kazao jedan od promotora Esad Dedić, „ono što nije zapisano, kao i da nije postojalo“. Drugi promotor bio je prof.dr. Edin Mutapčić koji je ovom prilikom kazao: - Nema sumnje kako je ovo svečani trenutak, jer to je prvi „Godišnjak“, koji će vjerujem ubuduće postati i redovan. U njemu su zastupljeni tekstovi uglavnom mladih srebreničkih intelektualaca poput Nermina Tursića, Asmire Bešić, Hamida Mutapčića, Edina Djedovića, Almedina Ibrišimovića, Samira Selimovića..., ali i poznatih imena poput profesora Šaćira Filandre i Omera Ibrahimagića, kazao je Mutapčić. O ovome projektu glavni i odgovorni urednik „Godišnjaka“, te predsjednik „Preporoda“ Nermin Tursić je kazao: - Na ovome projektu smo radili više od deset mjeseci, a kada sam odlučio da pokrenem jedan ovakav projekat, mnogi su mi kazali da će biti teško, u šta sam se i uvjerio. Ipak, kada vidim šta smo ovim postigli, moram kazati kako mi nije nimalo žao što sam izdvojio svoje vrijeme kako bi Srebrenik dobio svoj prvi „Godišnjak“, rekao je Tursić. Po završetku ove promocije, prisutnima se predstavio Ahmet Hogić, koji je promovisao prvi CD sevdalinki, na čijem se albumu nalazi osam prelijepih pjesama, a koji je ugledao svjetlo dana zahvaljujući najviše „Preporodu“ i muzičkoj produkciji „Music-Vik“ iz Srebrenika, kojom rukovodi Vehbija Ibrahimović-Kigen. Prezentiranim sadržajima zvanično je završena manifestacija "Dani povelje 2010".

Promovisana knjiga „Dželiti naroda mog“ autora Avde Huseinovića

U organizaciji BZK „Preporod“, dana 26.02.2010. godine, u kino sali srebreničkog Doma kulture, održana je promocija knjige „Dželiti naroda mog“, autora Avde Huseinovića iz Sarajeva. Kako su istakli promotori Esad Dedić i mr. Nermin Tursić, u knjizi se govori o događajima i pojedincima iz proteklog rata u BiH, pri čemu posebno mjesto zauzima autentičan opis ubijanja civila i silovanja Bošnjakinja u Foči i njenoj okolini. – „Uprkos stravičnim zločinima počinjenim nad Bošnjacima, u knjizi nema jezika mržnje ni poziva na osvetu. Prevashodni cilj mi je bio da pokušam objasniti genezu zločina nad Bošnjacima i da ukažem na ogromnu količinu mržnje usmjerenu prema Bošnjacima, te da pokušam odgonetnuti šta se dešavalo



Esad Dedić, Avdo Huseinović i mr. Nermin Tursić

u glavama krvnika koji su bili u stanju ubijati i bezimene bebe“, istakao je autor knjige Avdo Huseinović. Ukazujući na tragediju Bošnjaka pred kojom svaka normalna osoba zanijemi, autor pokušava spriječiti da padnu u zaborav zločini nad Bošnjacima u proteklom ratu, jer, kako je istakao Huseinović, narod koji zaboravi jedan zločin sluti da će mu se dogoditi i drugi. Huseinović je pričao kako ga je najviše interesovala geneza zločinca, te da nikad neće shvatiti, zbog čega su Bošnjake ubijali ljudi kojima su sestre udate za Bošnjake, koji su oženjeni Bošnjakinjama, kojima su najbolji drugovi iz djetinjstva bili Bošnjaci, te da ne može nikada shvatiti ovodunjalučku pravdu u kojoj jedan zločinac poput Dragana Nikolića Jenkija iz Vlasenice, u Haagu dobije 20 godina zatvora za 500 ubijenih u logoru Sušica, što iznosi 14 dana po ubijenom Bošnjaku. Nakon promocije knjige, upriličena je i projekcija dokumentarno-igranog filma Avde Huseinovića „Vanzemaljci iznad Sarajeva“, koji govori o stradanju Sarajlija u proteklom ratu i najvećim herojima odbrane glavnog grada BiH.

Obilježen 1. mart, Dan civilne zaštite FBiH

Dana 02.03.2010.godine, u Vatrogasnom domu u Srebreniku, održana je svečana sjednica Općinskog štaba civilne zaštite Srebrenik (OPŠCZ), kojom je na prigodan način obilježen 1. mart, Dan civilne zaštite FBiH i Svjetski Dan civilne zaštite. Pored članova OPŠCZ, svečanoj sjednici prisustvovali su i predstavnici zakonodavne i izvršne vlasti Općine



Doc. dr. Milan Stević i Smail Hamidović

Srebrenik, te predstavnici raznih udruženja građana s područja ove općine. Uvodni referat je podnio načelnik OPŠCZ Bajro Imširović, dok je istaknutim pojedincima nagrade i priznanja dodijelio komandant OPŠCZ Mehmed Bajraktarević. Novčanu nagradu u iznosu od 300 KM dobio je doc. dr. Milan Stević iz Tuzle, redovni profesor Rudarsko geološkog fakulteta Univerziteta u Tuzli, dok je pismenu pohvalu dobio Smail Hamidović, vatrogasac u profesionalnoj vatrogasnoj jedinici općine Srebrenik. U obrazloženju je navedeno da je prof. Stević često bio stručni konsultant općine Srebrenik za poslove sanacije klizišta, a posebno se cijeni njegov angažman na efikasnoj primjeni zaštite i spašavanja na sprečavanju daljeg širenja i nastajanju većih štetnih posljedica od klizanja zemljišta u naselju Ahmići, dok je Hamidović, osim što je bio jedan od ključnih vatrogasaca, kao vrstan automehaničar tokom 2009.godine vodio brigu o državanju veoma starog voznog parka, čime je ostvarena velika ušteda budžetskih sredstava. Prilikom obraćanja prisutnima, human gest, koji je svojstven samo velikim ličnostima, je pokazao prof. Stević, koji se odrekao novčane nagrade u ime Džematskog odbora u Sladnoj, koji trenutno gradi džamiju u ovom mjestu, zbog čega je i nagrađen velikim aplauzom. Na kraju ove sjednice načelnik OPŠCZ Bajro Imširović je uručio kandidatima koji su uspješno završili obuku, certifikate o završenoj obuci za Gorsku službu spašavanja.

Obilježen mjesec zaštite od požara

U povodu obilježavanja Mjeseca zaštite od požara-maj 2010, Vatrogasna jedinica Srebrenik je organizirala press-konferenciju, na kojoj su gostima komandir Raib Džaferović i šef Službe Civilne zaštite Bajro Imširović predstavili cilj i program manifestacije. Cilj akcije je da se građani upoznaju sa opasnošću od požara. Želja je da se preventivno djeluje prema građanima, kako bi oni znali kako rukovati protiv-požarnim aparatima, a pripremljeni su i brojni edukativni leci. Tokom maja 2010.g. vatrogasci su posjetili firme „Herceg“, „Fanu“ i „Bingo“ te nekoliko osnovnih škola, kako bi se što više populariziralo



Sa druženja mladih vatrogasaca

vatrogastvo. Prezentirano je i gašenje požara u „Dječijem obdaništu“, a za kraj su vatrogasci, u sadejstvu sa policijom i Hitnom pomoći, u krugu nekadašnje firme „Interplet“, izveli i jednu pokaznu vježbu. Upriličeno je i druženje vatrogasnih podmladaka iz Sarajeva, Tešnja i Srebrenika. Na poligonu malih sportova ispred „Prve osnovne škole“ mladi vatrogasci iz ova tri grada, demonstrirali su vježbe iz gašenja požara, čime su pokazali zavidan nivo znanja. –Ovo druženje organizirano je da mladi već sada počnu sa ozbiljnim razmišljanjem iz oblasti gašenja požara. Oni



Sa pokazne vježbe u krugu bivšeg Interpleta

su pokazali visok nivo znanja i nagovještavaju kako će ubuduće biti pravi vatrogasci, kazao je Džaferović. Po okončanju vježbi, mladi vatrogasci su položili cvijeće na Centralno spomen-obilježje (1992-1995), gdje im se obratio i općinski načelnik Osman Suljagić, nakon čega je upriličena i fudbalska utakmica u JU „Sportsko-rekreativni centar“ Srebrenik, da bi druženje bilo okončano u planinarskom domu „Lipici“ na Majejici.

Velike poplave i klizišta u Srebreniku

Kiša, koja je nekoliko dana intenzivno padala krajem maja i početkom juna 2010.g. dana, prouzrokovala je velike poplave i klizišta na području kompletne općine Srebrenik. Od poplava su direktno bila ugrožena naselja uz korito rijeke Tinje, njenih pritoka i brojnih lokalnih potoka, tako da je



Vatrogasci u akciji u Barama

najgore stanje bilo na području Špionice, Bara, Previla, Tinje i Dubokog Potoka, gdje su dvorišta brojnih kuća potopljena dok je u nekoliko porodičnih kuća ušla voda tj. podrumi ili prizemlja su bili poplavljeni. Na mjernoj letvi na rijeci Tinji na mostu u Barama, u jednom momentu je bila izmjerena visina od 3,8 metara, što je dosadašnji maksimum. Tim povodom održana je vanredna sjednica Štaba CZ Srebrenik, na kojoj su formirane ekipe koje su konstantno obilazile teren i dojavljivale promjene na terenu, a nakon što je, na prijedlog OpŠCZ Srebrenik, općinski načelnik Osman Suljagić donio Odluku o proglašenju stanja prirodne nepogode od poplava i klizanja tla na području općine Srebrenik, angažovana je Služba zaštite i spašavanja od rušenja, koja je sa svom mehanizacijom i ljudstvom izašla na terenu, ali obzirom na nedostatak mašina teško je bilo stići na sve strane. Na više lokaliteta su dovučeni pijesak i vreće, kako bi se pokušalo pomoći građanima da zaustave prodor vode u prizemlja kuća, sa nekoliko



Probijanje nasipa u Špionici

mašina su na terenu rađeni prioritetni zahvati, kako bi se stanje kako tako poboljšalo ili bar zadržalo trenutno. Angažovani su i vatrogasci, koji su neprestano pumpama



Aktivirana su brojna, što stara što nova, klizišta

u NN Bare pokušavali spriječiti prodor vode u nekoliko kuća. U NN Kiseljak se, dodatnim nasipom na potezu od 40m, uspješno spriječio prodor Tinje u istoimeno naselje sa nekoliko stotina porodičnih kuća, a u Špionici, gdje je most za naselje Kosica bio zatvoren za saobraćaj, poplavljeni su bila dvorišta brojnih stambenih i pomoćnih objekata u Centru Špionice (ugrožena je bila lokalna ambulanta, matični ured, zgrada područne pošte...), a probijanjem nasipa odvedena je akumulirana voda, koja je prijetila većem dijelu naselja, a po smirivanju stanja nasip je ponovno uspostavljen. Istovremeno je teško stanje bilo na području Previla, Tinje-posebno u naselju Kolona, kod pravoslavne crkve u Potpeću, kod benzinske pumpe OMV, u Dubokom Potoku i Bjelavama, iznad Drenika, te u Ormanici, poplavljeni su bili i neki porodični i pomoćni objekti, a procjena šteta će se znati po prezentaciji i usvajanju Zapisnika komisije za procjenu od strane Općinskog vijeća, a sigurno iznosi nekoliko stotina hiljada maraka. Pored ovih problema aktivirana su i brojna klizišta, kako postojeća tako i nova, tako da je evidentirano preko 50 klizišta a među njima su: regionalni putni pravac prema Čeliciu ugrožen kod mosta Kovačevac, zatvoren je lokalni put Gornji Moranjci-Donji Moranjci pored fazanerije, dok je istovremeno ugroženo više stambenih objekata u Crvenom Brdu, Lušnici, iznad kuće Joldić Sulje, Donjim Moranjcima iznad stambenog objekta Šabuljić Vahidina, u Gornjim Moranjcima, Vrelima, Zubovom Brdu, Lisovićima.... Osim navedenog poplavljeni su preko 300 hektara poljoprivrednog zemljišta, gdje su brojne poljoprivredne kulture potpuno uništene, poplavljen je bio i stadion NK „Mladost“ Tinja, a štete od poplava su pretrpile i firme "Staklomont" i Asfaltna baza "Jata" u Tinji, kao i "Voćni rasadnik" u Špionici. U inicijalne radove na saniranju najtežih slučajeva Općina Srebrenik je utrošila oko 70.000 KM, dok je za ove namjene manja novčana pomoć stigla i od Vlade TK. Prestankom padavina, nekoliko dana nakon toga, načelnik je na prijedlog OpŠCZ Srebrenik donio Odluku o prestanku stanja prirodne nepogode od poplava i klizanja tla na području općine Srebrenik te usvojio nekoliko naredbi, čijom implementacijom bi se trebala spriječiti ili bar smanjiti slična dešavanja ubuduće.

Delegacija Medžlisa IZ Srebrenik posjetila Župu Špionica

Dana 02.03.2010. godine, delegacija Medžlisa IZ Srebrenik je posjetila Župu Špionica. Delegaciju su sačinjavali predsjednik Medžlisa IZ Srebrenik, Mevludin ef. Joldić i glavni imam Refik ef. Hodžić. Navedenu delegaciju je dočekaao fra. Blaž Marković, koji im je pokazao prostorije župne zgrade koje su uništene u nedavnom požaru te ih upoznao sa procesom obnove i rekonstrukcije prostorija. U prijateljskoj atmosferi i razgovoru, koji je trajao skoro dva sata, uz kafu i sok,



Fra. Blaž Marković, glavni imam Refik ef. Hodžić i predsjednik Medžlisa IZ Srebrenik Mevludin ef. Joldić

razgovaralo se o aktivnostima vezanim za vjerski život, kao i problemima sa kojima se svakodnevno susreću vjerski službenici na našim prostorima. Ovom prilikom je od strane Medžlisa IZ Srebrenik, u znak pomoći na otklanjanju posljedica požara, Župi Špionica uručena i skromna novčana donacija. Fra Blaž Marković se u ime župljana i u svoje ime zahvalio na posjeti i donaciji koja im je uručena, pozvavši goste da ponovo dođu u župu Špionica, istakavši pri tome i svoju zahvalnost na ranijoj posjeti općinskog načelnika Osmana Suljagića i predsjedavajućeg OV-a Ibrahima dr. Zukića, po istom pitanju. Na kraju prijema Mevludin ef. Joldić se zahvalio na toplu prijemu te pozvao fra Blaža Markovića u posjetu Medžlisu IZ u Srebreniku. Ispred općine Srebrenik ovoj posjeti je prisustvovao i Esad Dedić.

Proslavljen Uskrs/Vaskrs

Pravoslavni i katolički vjernici ove godine su istog dana proslavili Uskrs odn. Vaskrs. Uskrs/Vaskrs je najveći hrišćanski praznik kojim se slavi uskrsnuće Isusa Krista iz mrtvih i koji predstavlja suštinu hrišćanske vjere. Isus Krist je svojim



Sa proslave Uskrsa/Vaskrsa u Ceriku

uskrsnućem iz mrtvih pobijedio smrt i svim ljudima od Adama i Eve do posljednjeg čovjeka na Zemlji darovao vječni život. Činom stradanja na krstu, kad bezgriješni Krist prima na sebe grijeh cijelog ljudskog roda, a potom i činom uskrsnuća, kad pobjeđuje smrt koja je posljedica grijeha, uz istovremeno obećanje uskrsnuća svim ljudima, on dokazuje i pokazuje da je Mesija i Pomazanik - spasilac svih ljudi. Bez Uskrsa/Vaskrsa kršćansko vjerovanje ne bi imalo nikavog smisla. Uskrs/Vaskrs je praznik pobjede života nad smrću, dobra nad zlom. Proslavu, kojoj je prethodila priprema višenedjeljnim postom, vjernici najprije počinju u hramovima, okupljeni u zajednici na Svetoj liturgiji/misi, čiji vrhunac predstavlja pričešće - sjedinjenje sa Bogom. Potom se proslava nastavlja u krugu porodice, gdje posebnu draž, naročito djeci, predstavlja tucanje šarenim jajima. Šareno jaje predstavlja simbol rađanja života, pile prokljuje ljusku i izlazi, kao što je Krist ustao iz mračnog groba. Gotovo idiličnu, i gotovo nestvarnu sliku, smo zatekli u Ceriku kod Špionice, općina Srebrenik, gdje su u jednoj porodici zajedno proslavljali Uskrs/Vaskrs Hrvati i Srbi dok su im u gostima bili Bošnjaci- prijatelji i kolege s posla. Osim brojnih jela, pića i nezaobilaznih šarenih jaja, poseban štimung su priredile žene obučene u tradicionalne narodne nošnje ovdašnjih Srba i Hrvata.

Za Damira ef. Babajića prikupljeno oko 10.500 KM

Dana 25.04.2010.g., u „SRC“ Srebrenik, održan je humanitarni koncert za Damira ef. Babajića, kojem su neophodna sredstva za nastavak liječenja u Moskvi. Na istom je prikupljeno blizu 11.000 KM, a ova novčana sredstva će mu dobro doći kako bi ovaj 26-godišnjak pokušao ponovo stati na svoje noge, obzirom da se zbog povrede kičme u saobraćajnoj



Damir ef. Babajić sa čekom od 10500 KM

nesreći, već drugu godinu nalazi u invalidskim kolicima. Glavne zvijezde večeri bili su Hanka Paldum i Halid Bešlić, koji su oduševili više od 1.000 posjetilaca, svojim starim i novim hitovima, dok su kao uvodni pjevači na sceni bili još Vahida Halilović, Jasmin Hasić, Azra Husarčić, Denis Bjelošević, Suad Mehmedović i Merima Džafić, a koje je pratio „Rio bend“. Koncert je inače održan na inicijativu Mjesne zajednice Bare, u organizaciji JU „Sportsko-rekreativni centar“ Srebrenik, a pod pokroviteljstvom Općine Srebrenik, i to sve u cilju pomoći ovom vjerskom službeniku. Na kraju koncerta, načelnik općine Srebrenik Osman Suljagić te Hanka Paldum i Halid Bešlić uručili su Damiru ček sa iznosom od 10.500 KM, dok je naknadno prikupljeno još sredstava. U svemu ovome, najvažnije je spomenuti kako nijedan učesnik ove manifestaciji nije ništa naplatio, pa čak ni Hanka Paldum i Halid Bešlić, koji su još jednom pokazali svoju veličinu i humanost.

Tinja bogatija za 400 kg. šarana

Predstavnici Ribolovnog društva „Zeba“ Srebrenik, krajem aprila izvršili su poribljavanje Tinje sa 400 kg šarana na više lokacija na području općine Srebrenik. Ovaj projekat, vrijedan blizu 2.500 KM, obezbijedili su predstavnici ovog ribolovnog društva, a njihov predsjednik Nihad Buljubašić je kazao: - Mi smo dobili koncesiju na deset godina za održavanje rijeke Tinje, tako da je ovo jedna vrsta naše obaveze. Do kraja maja traje zabrana pecanja kako bi se obnovio

riblji fond, ali moram da istaknem kako neki ribari skidaju ove table na kojima piše da je zabranjen ribolov. U narednom periodu izvršit ćemo i jednu ekološku akciju sa raznim udruženjima i učenicima, kako bismo imali što čišću Tinju, kazao je Buljubašić. Poribljavanju je prisustvovao i kantonalni poljoprivredni inspektor Ernad Nadžaković, koji je ovom prilikom kazao: - Mi smo predvidjeli kaznene mjere za one koji se ne budu pridržavali ovih zabrana, ali u svakom slučaju naša je želja da djelujemo edukativno i da upoznamo bolje naše stanovnike kako se ponašati prema rijekama i ribama.

Srebreničanke na 22. svjetskom debatnom takmičenju u Dohi

U periodu od 08.02 do 18.02.2010. god., održano je 22. svjetsko debatno takmičenje u Dohi u državi Qatar. Na takmičenju je učestvovalo 57 ekipa iz cijelog svijeta. Debatanti Bosne i Hercegovine, izabrani od strane Centra za kulturu dijaloga su bili: Armin Ridžalović (Brčko), Šejma Beganović (Gračanica), Milan Lubura (Pale) te Adisa Džanić i Šejla Husarić, učenice MSŠ Srebrenik, u kojoj postoje dva debatna kluba. Oba kluba su postigla značajne rezultate na državnim takmičenjima te su time zasluženo pozvani od Centra za kulturu dijaloga da pošalju svoje debatante u tim BiH. Ovo je, također, velika čast i za MSŠ



Članovi našeg tima u Dohi

Srebrenik, jer je to jedina škola u BiH, iz koje su dva debatanta ušla u državni tim. Teme koje su debatanti pripremali nekoliko mjeseci unaprijed bile su sljedeće: 1) Da li trebamo podržati vojnu intervenciju u Somaliji, 2) Da li teroristi trebaju imati pravo na suđenje u civilnim sudovima, 3) Da li bi doktori izvješće o bračnom zlostavljanju trebali prijavljivati policiji i 4) Da li bi svaka država trebala imati pravo na posjedovanje nuklearnog oružja. Osim pripremljenih, debatanti su u 8 kola imali i 4 nepoznate teme, za koje su imali 1h za pripremu, bez pomoći trenera i korištenja interneta. Budući da je ovo timu BiH prvo takmičenje u ovakvom formatu, te da su se debate odvijale na engleskom jeziku, naš se tim nije uspio plasirati u osminu finala. Naša ekipa je zadovoljna rezultatom na jednom ovako prestižnom takmičenju a za sljedeću godinu se nadaju još boljim rezultatima.

Održan "Novinarski dan 2010"

Novinari sa Tuzlanske regije su 29. maja 2010. godine, na planini Majevidi, upriličili dan zabave i druženja, pretendirajući da pod nazivom „Novinarski dan“, to postane tradicionalno godišnje okupljanje uposlenika u medijima. Pored zabavnih sadržaja, organizator Bosanska medijska grupa (BMG), po dolasku novinara na Majevidu, upriličila je i prigodno predavanje među zidinama Starog grada Srebrenika, o historiji ovoga kraljevskoga grada. Predavač je bila historičarka Nedžiba Vikalo, a



Novinarima je predstavljena historija Starog grada Srebrenika

nakon zanimljivog spleta historijskih fakata, legendi i narodnih predaja, koji su odlikovali ovo izlaganje, kafu „dočekušu“ pripremio je Vispak, dočekavši novinare iz gradova u FBiH, RS-a i iz Brčko Distrikta BiH, svojim brojnim slasticama. Novinarski karavan potom je sa Staroga grada Srebrenik produžio na lokalitet Lipici, nedaleko od ovdašnjeg planinarskog doma, da bi druženje bilo nastavljeno na privatnom imanju slikara Svjetlana Bešića, na kojem se svake godine početkom juna održava, a i ove godine je održana, privatna likovna kolonija sa motom „umjetnici spašavaju Majevidu“. Izvrstan ugođaj upotpunili su i brojni drugi sponzori. Novinari su uz obilje nagradnih igara, zanimljivih natjecanja i muziku uživo, proveli nezaboravan dan. Ajša Mevkić, PR menadžerica u firmi BMG, zahvalila se svim gostima i sponzorima velikog novinarskog druženja, te najavila na proljeće sljedeće godine ponovno održavanje Novinarskog dana: -Imamo želju da ova manifestacija postane tradicionalna. Novinari rade i vikendom i praznicima, prate druge događaje, a za svoje nemaju vremena, niti im ko želi organizirati događaj samo za njih. BMG se stoga i odlučio da kreira Novinarski dan 2010, za koji možemo kazati da je uspio, jer se na Majevidi pojavilo više od stotinu gostiju koji su uživali, družili se, razmjenjivali iskustva i upoznali Majevidu kao jednu od najljepših planina na Balkanu, kazala je Ajša Mevkić. Cilj do sada najvećeg okupljanja novinara sa Tuzlanske regije prije svega je bio druženje i zabava, ali i želja da se sa planine Majevice pošalju poruke javnosti BiH da



Novinari na privatnom imanju Svjetlana Bešića

novinari tragaju za dobrim vijestima, pozitivnim događajima i da žele u svijet plasirati dobru stranu Bosne i Hercegovine. Novinarski dan 2010 bio je na svojevrstan doprinos projektu brendiranja turističkih potencijala Majevice i Starog grada Srebrenika, a projekat je podržan od Federalnog ministarstva turizma i Turističke zajednice Tuzlanskog kantona.

Održana "Medicinijada 2010"

JZU „Dom zdravlja“ Srebrenik je u periodu od 21. do 23.05.2010. godine, u Neumu, bio domaćin 11. Sportskih susreta zaposlenika u zdravstvu Sjeveroistočne Bosne „Medicinijada 2010“. Kako je istakao Ešref dr. Harčinović, predsjednik organizacionog odbora, ovo je bila najmasovnija i, prema ocjeni većine učesnika, najkvalitetnija Medicinijada do sada, na kojoj je učestvovalo 640 takmičara iz 19 zdravstvenih ustanova sjeveroistočne Bosne te po prvi put i predstavnici Doma zdravlja Mostar. Takmičenja su se održala u 11 disciplina, a obzirom da su ekipe DZ Srebrenik uzele pehare u 8




Zajednička fotografija načelnika Suljagića sa fudbalskom ekipom DZ Srebrenik, nakon pobjedničkog susreta

disciplina naš Dom zdravlja je ponio tutulu sveukupnog pobjednika Medicinijade. Medicinijadu su zajednički otvorili općinski načelnik Osman Suljagić i ministar zdravstva TK-a Musić Asim.

Proslavljene godišnjice OŠ

Kraj školske godine, u periodu od 15 maja do 25 maja, se tradicionalno oobilježava svečano u svim osnovnim školama. Uposlenicima i učenicima na kraju školske godine, dodijeljena su priznanja za postignute uspjehe



Otvorenje prilazne staze za invalide u OŠ Tinja

u nastavnim i vannastavnim aktivnostima, uz obavezan bogat kulturno-zabavni program. Neke škole su se, pored uspjeha u nastavnim i vannastavnim aktivnostima, mogle pohvaliti i radovima na uređenju škole, dvorišta... Tako je svečano obilježen i Dan škole u JU OŠ „Tinja“ u Tinji, kom prilikom je otvorena prilazna staza za invalidne osobe, a po projektu kojega je realizirala JU OŠ „Tinja“ u saradnji sa Fondacijom tuzlanske zajednice i Međunarodnim udruženjem



Nagrađeni učenici u Drugoj OŠ

MIOS iz Tuzle. Novoizgrađeni prilaz školi otvorili su predsjednik MZ Tinja Huso Zukić i predstavnik udruženja MIOS iz Tuzle Alen Salihović. Menadžment Prve OŠ Srebrenik je prvi puta Dan škole proslavio u prepunoj Kino Sali Doma kulture, dok je Druga OŠ proslavu upriličila u novoj filmskulturnoj dvorani, a svečano je Dan škole proslavljen i u ostalim školama sa našeg općinskog područja. U narednim priložima prikazujemo neke izvještaje sa općinskih takmičenja i to:

Biologija i hemija

U Drugoj OŠ Srebrenik održano je općinsko takmičenje iz biologije, oblast „Ekologija i zaštita životne sredine“. Prvo mjesto je osvojila Džejlana Osmanović, na drugom mjestu je Amir Hodžić, a na trećem Alma Selimović, svi iz Druge osnovne škole Srebrenik, dok četvrto mjesto dijele Ajla Ibrić iz OŠ „Špionica“ i Amir Arnautović iz OŠ „Tinja“. U



ekipnoj konkurenciji najuspješnija je bila Druga osnovna škola, na drugom mjestu je OŠ „Tinja“, a na trećem OŠ „Špionica“. Na takmičenju iz hemije najbolja je bila Amra Gavranović iz Druge OŠ, koja je na kantonalnom takmičenju iz hemije bila druga.

Matematika

U Prvoj OŠ Srebrenik, održano je općinsko takmičenje iz matematike. U kategoriji V razreda najbolji je bio Sulejman Salkić iz Prve OŠ Srebrenik, drugi je Maid Moranjkčić iz iste škole, dok su 3. mjesto podijelili učenici OŠ „Podorašje“ Ivan Šibonjić i Ermin Muratović. U konkurenciji VI razreda prvo mjesto dijele Ajla Husić iz Druge OŠ i Ilija Mijić iz OŠ „Podorašje“, a potom slijede Vildana Sekić iz Druge OŠ i Edin Kešetović iz OŠ „Rapatnica“. Najbolji u konkurenciji



VII razreda je Adis Čizmić iz Druge OŠ, druga je Amra Gvozden iz Prve OŠ, dok je treća Vanesa Dedić iz OŠ „Podorašje“. U kategoriji VIII razreda prvo mjesto je osvojila Irma Hadžić iz Druge OŠ, druga je Amina Husićić iz OŠ „Špionica“, a treći Jasmin Šečić iz OŠ „Duboki Potok“.

Fizika

U OŠ „Rapatnica“ održano je općinsko takmičenje iz fizike. U konkurenciji učenika VII razreda 1. mjesto je osvojio Denis Muratović iz Druge OŠ Srebrenik, drugi je Džemal Jukić iz



iste škole, dok je treća Alma Medenjaković iz OŠ „Sladna“. Kod VIII razreda najbolja je bila Amina Husićić iz OŠ „Špionica“, drugo mjesto dijele Igor Lukanović iz OŠ „Podorašje“ i Dženana Zahirović iz Druge OŠ, dok je na trećem mjestu Hamida Okić iz OŠ „Sladna“. U ekipnoj konkurenciji u kategoriji VII razreda prvo mjesto je osvojila Druga OŠ, dok je kod VIII razreda najuspješnija bila OŠ „Špionica“.

Engleski jezik

U OŠ „Sladna“ održano je općinsko takmičenje iz engleskog jezika. Najuspješnija je bila ekipa Prve OŠ Srebrenik sa 334 boda, druga je OŠ „Podorašje“ s 309 bodova, treća je



Druga OŠ Srebrenik s 302 boda, dok je četvrta ekipa OŠ „Rapatnica“ s 301 bodom. U pojedinačnoj konkurenciji u kategoriji V razreda na 1. mjestu je Belmin Bašić iz OŠ Podorašje, druga je Dženana Pedljić iz OŠ Rapatnica, dok je treći Sulejman Salkić iz Prve OŠ Srebrenik. Među učenicima VI razreda najbolja je bila Ajla Kešetović iz Rapatnice, druga je Emina Buljubašić iz Prve OŠ Srebrenik, a treća Darija Mulahmetović iz Druge OŠ. Kod VII razreda prva je Merima Selimović iz Prve OŠ, drugi je Borislav Omerović iz Druge OŠ, a treći Džemal Jukić, takođe, iz Druge OŠ. Kod VIII razreda najbolji je bio Eldin Moranjkčić iz Prve OŠ, druga je Zerina Pedljić iz Rapatnice, dok je treća Alma Kavazović iz Druge OŠ.

Donirana računarska oprema OŠ «Tinja»



Detalj sa donacije računara

Dana 02.06.2010.g. Hazema Begić, predstavnica firme BH Telecom d.d. Sarajevo, direkcija Tuzla, uručila je Enisu Dediću, direktoru JU Osnovna škola "Tinja" iz Tinje, računarsku opremu koja se sastoji od 5 kompleta računara sa pratećom mrežnom opremom i printerom. To je vrijedna nagrada kojom će biti upotpunjen fond računara kojim raspolaže informatički kabinet u JU OŠ "Tinja". Pomenuta nagrada je osvojena tako što je škola "Tinja" uzela aktivno učešće na takmičenju koje je organizovao naš telekom



Učenici OŠ Tinja sa doniranim računarima

operater pod nazivom „Simbol moga grada“ 2009. godine. Tom prilikom je napravljena kvalitetna prezentacija, u slici i riječi, grada Srebrenika i njegovog simbola „Gradine“, a sve aktivnosti vezane za učešće na konkursu, uz menadžment škole, vodila je, više nego uspješno, nastavnica historije Azra Hadžić.

Koncert polaznika Muzičke škole



Dio polaznika odjeljenja Muzičke škole u Srebreniku

Prigodnim koncertom polaznika odjeljenja Muzičke škole u Prvoj osnovnoj školi u Srebreniku, dana 02.06.2010.godine, obilježena je trogodišnjica uspješnog rada ovog odjeljenja te ozvaničen početak upisa novih učenika u Muzičku školu. Direktor škole Hasan Nurikić i prisutni roditelji su, kao i do sada, bili ugodno iznenađeni prezentiranim muzičkim umijećem polaznika škole na harmonici, klaviru i gitari. Kao što je poznato u Prvoj osnovnoj školi u Srebreniku, školske 2007/2008. godine formirano je odjeljenje Muzičke škole, a na osnovu viđenog postignut je pun pogodak.

MŠ Srebrenik proslavila 33. rođendan



Direktor Nišić dodjeljuje priznanje Bojani Stojanović

Dana 22.04.2010.godine, u Kino Sali Doma kulture Srebrenik, učenici, profesori i ostali uposlenici obilježili su 33 godine rada Mješovite srednje škole Srebrenik. Direktor Sumedin Nišić podsjetio je na početak rada MŠ daleke 1977. godine, te naglasio da je ovo danas najveća obrazovna ustanova na području TK sa 1707 učenika, sa 55 odjeljenja te 113 uposlenih. Tokom izlaganja izjavio je da je prošlu školsku godinu završio 491 učenik, ali da se javlja problem kuda nakon okončanja srednjeg obrazovanja. Nišić je naglasio da se cijela društvena zajednica treba uključiti u ovaj problem, te da će od naredne školske godine biti oformljena i nova odjeljenja, potrebna lokalnoj privredi. Također, podcrtao je i neophodnost izgradnje nove školske zgrade. Na kraju manifestacije, učenici su pripremili bogat kulturno-zabavni program, dok su najuspješnijim učenicima dodijeljene diplome i zahvalnice. Učenicom generacije proglašena je Bojana Stojanović.

Izabrano najuređenije dvorište i poslovni krug

Povodom 5. juna, Međunarodnog dana zaštite čovjekove okoline i na osnovu Odluke o komunalnom redu općine Srebrenik, dana 02.06.2010.godine održana je prigodna manifestacija, na kojoj su podijeljene nagrade u izboru za najbolje porodično i školsko dvorište te poslovni krug u 2010.godini. U kategoriji najuređenije porodično



Prvo mjesto: dvorište Muratović Idriza iz Ježinca dvorište prvu nagradu u iznosu od 100KM te prigodnu diplomu dobio je Idriz Muratović iz Ježinca, drugu



Drugo mjesto: dvorište Avdić Rasima iz Čehaja nagradu u iznosu od 80KM te prigodnu diplomu dobio je Rasim Avdić iz Čehaja dok je treću nagradu u iznosu od 70KM te prigodnu diplomu dobio Huso Dadanović iz



Treće mjesto dvorište Dadanović Huse iz G. Srebrenika Gornjeg Srebrenika. U kategoriji najuređenije školsko

dvorište prvu nagradu u iznosu od 150KM te prigodnu diplomu dobila je Osnovna škola „Tinja“, dok je diplomu za najuređeniji poslovni krug dobilo JP „BH Pošte“ Srebrenik. Prigodne plakete za najuređenije dvorište su dobili Husić Alija i Mujčinović Nedim, oba iz Čehaja, a za doprinos u organizaciji i realizaciji programskih ciljeva i zadataka Eko zelenih Srebrenik nagrađeno je i 8 nastavnika iz srebreničkih OŠ.

Obilježen 22. maj, Dan policije TK-a

Dana 25.05.2010.godine, u prostorijama Policijske stanice Srebrenik, upričena je svečana dodjela novčanih nagrada učenicima osnovnih škola sa područja Općine Srebrenik, čiji su radovi, prema ocjeni stručnog žirija, izabrani za najbolje na nedavno provedenom natjecanju za izbor najboljeg likovnog i literarnog rada povodom 22. maja, Dana policije TK-a. Za najbolji likovni rad nagrade su uručene učenicima: 1. Husarić Azra i Husarić Emina (OŠ Duboki Potok); 2. Čaušević Azra (Prva OŠ Sreb-



Nagrađeni učenici

renik); 3. Mehmedović Ismihana (OŠ Tinja) dok su za najbolji literarni rad nagrade uručene učenicima: 1. Marjančević Vanesa (OŠ Špionica-područna škola G.Hrgovi); 2. Mujanović Lejla (Druga OŠ Srebrenik) i 3. Brašnjić Dženita (OŠ Tinja). Uručenje nagrada učenicima je nastavak, ranije provedenih, aktivnosti povodom povodom 22. maja, Dana policije TK-a. U okviru proslave Dana policije, položeno je i cvijeće



Proučena je i fatiha palim braniteljima

te proučena fatiha na Centralno spomen-obilježje palim braniteljima u Srebreniku, nakon čega je organizovan svečani prijem kod načelnika g. Osmana Suljagića i predsjedavajućeg OV-a Srebrenik g. Ibrahima Zukića. Izvršen je i obilazak porodica poginulih policajaca sa područja naše Općine, a komandir PS Srebrenik, skupa sa saradnicima, organizovao je svečani prijem za naše penzionisane pripadnike MUP TK-a.

Novo rukovodstvo Sportskog saveza

Na Skupštini „Sportskog saveza Općine Srebrenik“, koja je održana 12.04.2010. godine, za predsjednika Skupštine imenovan je Ibrahim Smajlović, koji je tako nakon dva mandata od osam godina naslijedio Jusufa Husarića, dok je već na prošloj sjednici dopredsjednikom imenovan Ivica Gudeljević. Skupština je imenovala i predsjednika Upravnog odbora, a povjerenje je opet dobio Elvedin Čudić, koji je ovu funkciju obavljao i u prethodnom mandatu, dok su za dva dopredsjednika imenovani Mato



Sa Skupštine Sportskog saveza

Matijević i Jusuf Husarić. Na Skupštini se raspravljalo i o Programu rada „Sportskog saveza“ za 2010. godinu, gdje je Hajra Mehić, trener u ŽKK „Feniks“, tražila da se ubuduće više konsultuju nastavnici sporta kada su u pitanju školska takmičenja. Članovi Skupštine smatraju da je potrebno do naredne raspodjele sredstava izmijeniti i kriterije, a tokom rasprave konstatovano je da je uglavnom svim članicama bilo nedovoljno novca, pa je zaključeno da klubovi moraju više lobirati na predstavnike zakonodavne vlasti, kako bi se više izdvojilo za sport, od budžetom predviđenih 155.000 KM. Bilo je i drugačijih mišljenja, od kojih je preovladavalo mišljenje predsjednika Košarkaškog kluba „Gradina“ Mursela Delića, koji je kazao kako klubovi moraju kvalitetnim kadrovima „pojačati“ Upravni odbor i preko njih pokušati obezbijediti dodatna sredstva, obzirom da u pojedinim klubovima jedna ili dvije osobe obavljaju više funkcija tj. trenera, sekretara, direktora i predsjednika kluba. Nakon diskusije najviše sredstava je pripalo fudbalu, čijih je osam klubova i „Fudbalski savez“ dobilo blizu 55.000 KM. Potom je „Sportskom savezu“ pripalo 24.000 KM, nakon čega slijedi Košarkaški klub „Gradina“ koji je dobio blizu 8.500 KM. Realizacija dogovorenih iznosa traži klubovima i savezima će zavisiti od dinamike punjenja budžeta Općine, od čega će najviše i zavisiti koliko će klubovi dobiti sredstava.

4. manifestacija „11 ljiljana“



Sa susreta FK „Bukovik“ i FK „Angeback“

U organizaciji FK „Bukovik“ iz Gornjeg Srebrenika održana je 4. manifestacija „11 LJILJANA“ posvećena jedanaestorici poginulih boraca – šehida Armije R BiH u proteklom ratu sa područja MZ Gornji Srebrenik. Manifestacija je počela u petak 23.04.2010. godine učenjem tevhida u mjesnoj džamiji u Gornjem Srebreniku za jedanaest poginulih boraca. Istog dana u 17 sati odigrana je međunarodna prijateljska utakmica između FK „Bukovik“ Gornji Srebrenik i FC „Angeback“ Degerfors Švedska, čiji je predsjednik naš sugrađanin Reuf Jahić. Rezultat je bio 3:1 za domaćina. Drugog dana, 24.04.2010. godine (subota) odigrana je revijalna utakmica između veterana FK „Partizan“ iz Gornjeg Srebrenika (generacija 1981 – 85) i veterana FK „Bukovik“ Gornji Srebrenik (generacija 1998 – 2009). Trećeg dana 24.04.2010. godine (nedjelja) izvršen je obilazak mezarja poginulih boraca i polaganje cvijeća na centralno spomen obilježje u Gornjem Srebreniku i spomen ploču „11 LJILJANA“ na fudbalskom stadionu FK „Bukovik“. Upriličen je i prijem za roditelje i porodice poginulih boraca kao i za boračke organizacije sa područja općine Srebrenik. Nakon toga odigran je i turnir u malom fudbalu gdje su učešće uzele 23 ekipe sa područja općine Srebrenik i jedna ekipa mještana privremeno zaposlenih u Sloveniji. Najbolja ekipa je bila ekipa FK „Bukovik“ Gornji Srebrenik. Drugo mjesto pripalo je ekipi „Huremi“ iz Hurema a treće ekipi „Špionica 1953“ iz Špionice. Za najboljeg igrača proglašen je Sead Džombić (FK „Bukovik“), najbolji golman je bio Mirsad Husejnović (FK „Bukovik“), a epitet najboljeg strijelca ponio je Arnel Čaušević („Huremi“). Turnir je proglasio otvorenim načelnik općine Srebrenik Osman Suljagić, koji je finansijski i pomogao održavanje ove manifestacije, a tom prilikom je istakao dobar primjer kako Udruženje građana FK „Bukovik“ Gornji Srebrenik čuva tradiciju sjećanja „najbolje sinove Bosne“.

NK "Gradina" u Prvoj ligi FBiH

Posljednjom utakmicom na drugoligaškom Sjeveru, u kojem su nogometaši Gradine remizirali pred domaćim navijačima sa ekipom Mramora, odigraivši susret bez pogodaka, ekipa iz Srebrenika je osvojila prvo mjesto te je i zvanično postala član Prve lige FBiH. U otvorenoj utakmici u kojoj su obje ekipe imale po nekoliko šansi koje nisu iskoristili kod domaćih Lelo, Mašić, Smajlović, i Popara a kod gostiju Džanić, Musić i Fejzić, zasjenila je



Nogometaši Gradine iz Srebrenika

teška povreda veznjaka Gradine Denisa Tahirovića, koji je nakon desetak minuta igre sanitetom prebačen u Dom zdravlja Srebrenik, gdje mu je konstatovana povreda meniskusa. Utakmica je prošla u fer i korektnoj igri u kojoj bodovi nisu ništa značili ni jednoj ni drugoj ekipi, a posebno je bitno istaknuti odlično suđenje koje se rijetko može vidjeti na drugoligaškim terenima. Poseban ugođaj na tribinama napravili su vjerni „Apachi“, koji su svih 90 minuta bodrili domaće igrače, a sjajan defile napravili su i članovi Moto-kluba „Gradina“ koji su kružili atletskom stazom. Slavlje je nastavljeno u piceriji „Hamby“ u kojoj se domaći napadač Siniša Žerić iskazao kao sjajan zabavljač sa harmonikom, a igračima, treneru i rukovodstvu Gradine čestitku je uputio i načelnik Osman Suljagić, koji je došao da lično čestita na povratku u prvoligaško društvo.

KK "Gradina" u A1 ligi FBiH

Sve je počelo u ljeto 2001. godine. Poziv za školu košarke tad je objavio trener Edis Bajrektarević, na jedinom košarkaškom poligonu u Srebreniku. Ubrzo klub privlači sve veći broj članova, a iste godine završava se i dugo očekivana sportska dvorana u Srebreniku. Dana 19.02. 2002. g. zvanično je i osnovan Košarkaški klub Gradina Srebrenik. Prve dvije godine svog postojanja klub se takmiči u Ligi Bolji Balkan sa mladim selekcijama, gdje pioniri, kao najprijetnije iznenađenje, osvajaju drugo mjesto u vrlo jakoj konkurenciji. Nakon toga slijedi pet vrlo uspješnih sezona u Ligi mladih RKS Tuzla gdje se i danas takmiče



Košarkaši Gradine iz Srebrenika

mlade selekcije tog kluba i svake godine se bore za jedno od prva tri mjesta. Kada je generacija mladića koji su prošli kompletnu školu košarke prevazišla juniorski staž, u sezoni 2008/09 donijeta je odluka da se ne okreću leđa momcima koji su od prvog dana u klubu, nego KK Gradina, po prvi puta, prijavljuje seniorsku ekipu u A2 Ligi FBiH. Najzaslužniji za ovaj hrabar potez bili su članovi uprave Nusret Šerifović i Edis Bajrektarević. Te prve sezone košarkaši Gradine, kao najmlađa ekipa, ostvaruju plasman u sredini tabele i polako se pripremaju za osvajanje Lige i prodor u veći razred. Pred početak sezone 2009/10 u klub se samoinicijativno javljaju sportski radnici Mursel Delić i Sabahudin Nurkanović. Trojka Šerifović, Delić i Nurkanović prave ambiciozan plan, a to je osvajanje prvog mjesta i plasman u A1 Ligu FBiH. S tim ciljem stvaraju odlične uslove za treniranje i dovode iskusnog igrača iz Tuzle Edina Nurkanovića i trenera Amira Delalića kao i asistenta Samira Arnautovića. Brigu o mladim selekcijama preuzimaju Edis Bajrektarević i Emir Jašarević. Rezultat svega je veliki uspjeh seniora Gradine u sezoni 2009/10, gdje superiorno osvajaju prvo mjesto sa omjerom 16-2 i ostvaruju plasman u A1 Ligu FBiH. Pioniri i kadeti Gradine se, u Regionalnoj ligi mladih Tuzla, nalaze u samom vrhu, tako da se za podmladak ne treba brinuti.

Uspjeh Martovaca u Bugojnu

Karatisti „1. marta“ iz Srebrenika na 7.međunarodnom karate turniru „Futura Kup 2010“ održanom u Bugojnu, osvojili su 32 medalje (20 zlatnih, 4 srebrne i 8 bronzanih), čime su postali najuspješnija ekipa, dok je Minela Hadžić, sa 6 zlatnih medalja proglašena najuspješnijom takmičarkom turnira. Zlatne medalje osvojili su: Minela Hadžić (3 zlatne), Elma Muratović (2 zlatne), Azra Kulović, Sanela Kešetović, Elma Kulović, Vezira Bričić, Anela Ibrišimović, Darija Mulahmetović, Edin Jašarević, Mirza Džanić, Almir Pjević, te dva borbena i tri kata tima. Srebrnim odličjem okitili su se: Azra Kulović, Azra Kurbašić, Armin Kešetović i Sakib Salihbašić, dok su bronzane medalje osvojili: Amela Husić, Elvira Hasanović, Mejra Sofić, Melisa Nišić, Nusreta Tufekčić, Enisa Jahić, Emir Jašarević i Aldin Karić.

Zerina Širbegović Miss Srebrenika

U organizaciji Direkcije Miss BiH i Centra za kulturu i informisanje Srebrenik, dana 12.03.2010.godine, u velikoj sali srebreničkog Doma kulture, održana je manifestacija izbora „Miss Srebrenika za Miss BiH“. Pred blizu 600



Zerina Širbegović-Miss Srebrenika za 2010.g.

posjetilaca nastupilo je 16 djevojaka s područja ove općine, a prema ocjeni stručnog žirija najljepša je Zerina Širbegović, kojoj je pripala titula Miss Srebrenika za 2010. godinu. Prva pratilja je Jasmina Tursunović, za drugu pratilju izabrana je Selma Junuzović, Miss šarma je Almerisa Borić,



Djevojke koje su se plasirale za izbor za Miss TK titula Miss fotogeničnosti pripala je Sabini Glotić, dok su za Miss publike proglašene Džana Mahović i Amna Hadžić. Najljepšim djevojkama uručeni su cvijeće i pobjedničke lente, a sedam najbolje plasiranih izborilo je i pravo da predstavljaju općinu Srebrenik na manifestaciji izbora Miss Tuzlanskog kantona.

Maturanti MSS Srebrenik proslavili maturu

U skladu sa tradicijom, koja traje već nekoliko godina, dana 25.05.2010.godine u 19 sati, ulicama Srebrenika, prodefilovali su svi maturanti Mješovite srednje škole Srebrenik. Praćeni od strane preko hiljadu Srebreničana i gostiju sa strane, maturanti su se, visoko uzdignuta čela, dostojanstvenim hodom i u prelijepim haljinama i odijelima, predvođeni svojim razrednim starješinama, nakon svečanog defilea gradskim šetalištem, okupili ispred Centralnog spomen-obilježja poginulim u ratu 1992-1995.g. na Trgu Alije Izetbegovića, gdje je priređen prigodan program. Maturantima se prvo obratio direktor MSS Srebrenik Sumedin Nišić, koji je izjavio da se nada da će i ovi mladići i djevojke dostojno predstavljati svoju školu i



Brojni građani su pratili defile maturanata

Općinu tokom daljnog školovanja ili tokom rada, te podsjetio da su brojni učenici ove škole postali vrsni stručnjaci iz raznih oblasti, da su gotovo svi učenici generacije iz prošlih godina ponajbolji studenti na svojim fakultetima, nerijetko sa prosječnom ocjenom deset. Prisutnima se obratila i Bojana Stojanović, učenica generacije MSS Srebrenik, predstavivši svoje viđenje proteklog perioda školovanja, a obzirom da se proslava mature, zbog niza objektivnih okolnosti, na koje se nije moglo utjecati, poklopila sa obilježavanjem 15. godina od masakra na tuzlanskoj Kapiji, najtežeg ratnog zločina nad civilnim stanovništvom Tuzle, delegacija maturanata je položila cvijeće na Centralno spomen-obilježje, te minutom šutnje i(li) učenjem fatihe odala počast najboljim sinovima i kćerima BiH, poginulim u proteklom ratu. U nastavku programa maturanti su, do 2 sata rano ujutro, bez većih ekscesa, nastavili prigodno druženje u Motelu «Park» Srebrenik, uz bogatu trpezu i prigodni muzički program.